

張文襄公書札

張文襄公全集卷二百二十一

書札八

致軍機處

日本商約事頃奉鈞函當卽派員按照指示各節與內
田面商添改第一款於所有中國征收出產銷場下加
出廠二字第六款改用國幣於款末照美約添惟彼此
商明凡納關稅仍以新關平核計爲準等字至此條毫
無窒礙句下原文係惟不得因中國改定國幣將應納
稅課及往來用款各數致明有增減及暗有增減用昭
公允等語前呂盛兩使已允入約而伍侍郎接議後以

此數語大礙主權堅持不肯於是復行駁辯致相持未
定倣處在京續議與內田面商彼總不肯刪此數語疊
次電滬商改伍侍郎謂若就原文增損總屬不妥因由
伍侍郎改爲中國改幣仿照日本及泰西各國改幣辦
法宗旨酌量辦理等語電囑倣處照改細玩伍改數語
甚屬靈妙蓋東西各國計利最精其改幣法制從無出
入喫虧之事亦從無他國干預之事如果中國真能仿
照各國辦法宗旨自必有利無弊且係仿照各國並非
商之各國復有酌量辦理字樣尤爲活便似不致各國
干預內田讀伍改數語沈思片刻點頭微笑意似贊伍

措詞之巧者此數語應請勿庸刪去若刪此數語則彼必照原文添明增減暗增減數語大不妥矣第七款度量權衡先從通商口岸辦起恐於關平完稅有礙遵與切商聲敘數語特於款末添敘惟以後新定度量權衡與現行之度量權衡有所參差或補或減應照數核算以昭平允等語庶將來納稅凡應補者必須補足以上各節內田公使均已照允卽刻電請日本政府核示惟東三省口岸彼堅不允將大東溝刪去謂安東與大東溝兩處何處相宜作爲口岸彼尙未測量特以美國改開安東故亦添入以免錯誤如必不允只可照原議索

開大東溝弁云此次商議此約彼處處將就祇欲八月十八日畫押而已若再挑剔遷延誤期已允者均作罷論等語意甚堅執應否准其仍照原議開大東溝之處統請裁定爲期已迫以上各節均祈速示以便電滬爲

禱

光緒二十九年八月十二日

復外務部

頃奉鈞函具承一是昨內田公使遣其參贊鄭永邦來告亦以前議章程刪去各節於限制官私學堂之意未能完密仍請添敘等語當詢以原擬此三節係奉我政府飭刪前經面商內田大臣當時並無異議何以此時

必欲重爲聲明該參實謂前此面商時內田大臣因注意在獎勵章程往辯復論刪去此三節實未留心今接外務部照送前章細加覆校實覺刪去各節甚有關繫蓋日本法律學堂收留學生各有自主之權政府亦不能強迫惟不給獎勵權操自我可藉此以明限制之意故於約束章程第一款末第六款末均敘明凡學堂不遵守此章程者所教中國學生概不給以獎勵又於獎勵章程篇末添叙中國學生非在照辦約束章程之學堂畢業者概不給本章程所定獎勵一條良以日本學堂眾多勢不能徧責其遵守中國章程惟明示以不守

此章程者卽不給獎勵則在學生旣奪其上進之階在學堂卽失其招徠之具相形見絀自然就我範圍內田大臣前謂必有獎勵章程乃有助中國實行約束之法蓋正爲此若竟刪去命意全失故不得不商請添敘此內田大臣所以爲貴國計別無他意等語細味其言甚屬有理正擬函請鈞示適奉垂詢知內田已先陳達竊思前項章程係經奏准此次添敘之三節自應列入奏定章程方足以昭鄭重擬請大部附片陳明一面迅速咨行日本公使及出使日本大臣總監督暨各省一律遵照若不奏明恐彼學堂及遊學生謂非奉旨定章仍

致無所顧忌耳

光緒二十九年
九月初八日

又

昨奉寒電敬悉壹是英使照稱江南議設專賣官膏局
湖北亦擬照此辦法有礙中英條約第五款法約第十
四款等因查英約第五款係不設公行聽便英商赴口
貿易法約第十四款係不可另有別人聯情結行包攬
貿易等語現查專賣官膏辦法他省雖屬收土售膏均
歸官辦然仍有准商任便販土之例並與約章無礙湖
北辦法較之他省更寬係商土官熬官膏商賣既係商
士自然任便販運復歸商賣何必另設公行照此辦理

於洋藥銷路毫無阻滯並不有背約章至所以必須立
廠督熬者因事關禁煙非將銷賣實數確查無以嚴限
制而絕根株地方官實行其主權豈另有別人可比官
商並不合本則非聯情結行商人各自買賣則非包攬
貿易以現在辦法細核約章毫無相礙之處況光緒十
一年煙臺續約專條首段英國政府深願聲明於行銷
洋藥之事須有限制約束之意原爲日後實行禁煙起
見該政府既願贊成自應按照當年所允辦理現當未
會議定之時洋藥自可照常銷售如果議有定額逐年
遞減自必照額認銷似不必誤會於事前過慮於事後

除將擬議章程另行抄送核閱及試辦有效再當奏咨立案外應請貴部先行據此聲駁爲要藥土流毒有礙公理英美兩國戒煙會起而反抗該政府始有此贊助我禁之說其實洋商之視爲利源者已疊生阻力卽我國奸商之因以爲利者亦百施其句串之術此關一鬆何以善後本年三月准民政部咨開英議院與汪大臣論及禁煙頗疑我意在暢行土藥專阻洋藥又民政部附送致英使節略各條有查洋藥進口總數折中定額遞年減成之議竊謂非勒地戶減種無以取信外人非禁設舖開燈無以遏絕沾染非辦熬膏專賣無以稽查

銷數湖北除已派員詳查煙地議章減種實力辦理外
擬請貴部查照民政部致英使節略第一條所開辦法
切向英使磋商將進口洋藥折中定額遞年減成預算
立表咨行各省按額照減定明官爲督熬商自買賣如
數認銷之法如果未屆期限或已禁絕原訂認銷洋土
亦應籌議如何停輟務祈明白詳愼切商立約通咨照
辦以便各省切實查禁預承成算有可籌維大局幸甚
至煙館設舖開燈湖北省城業已禁絕各府亦次第限
期嚴禁官熬督賣熟膏一事必得連續辦理現卽設廠
開熬未便坐失事機稍爲停輟以致販土奸商肆行句

串種煙莠民依舊違延做處飭局開熬於交涉所關係者亦必設法避開不致有礙以免外人藉口堪紓盡慮再風聞十年期滿萬一查禁未絕有應照遞減之數賠補之說究應如何賠補亦望酌定以隱地步統祈查照駁覆示知是所感荷

光緒三十三年七月

又

做處議訂粵漢鐵路暨鄂境川漢鐵路借款合同一事前曾將歷次商辦情形隨時飭高學司曾道前往面請崧生尙書詳示機宜昨復飭將合同底稿面呈核閱深荷盡籌周至指示方鍼至爲感泐茲於昨日卽十九日

將該合同先行草押特鈔呈一分敬祈再逐條公同核閱有無應再修改之處並祈轉呈邸座察核裁奪示復敝處專候貴部核定賜復後再行入奏敬祈迅賜核復不勝感禱琴軒中堂於此事原委知之最悉望並送一閱爲荷再附呈洋文合同一分並祈發交精通英文司員逐細核對一併示復尤紉公誼

宣統元年四月二十日

又

接准來函本月初七日美國柔使到署面稱奉本國政府電稱一千九百零四年外務部曾有公文致前康大
臣許以將來建築川漢鐵路如籌借外款先儘英美商

借現聞該路向英法德三國訂借特命向貴部聲明前
案鄙意如將美國增入通融辦理諒美國政府或可見
允等語爲此函達冰案卽希統籌酌核見復以便轉復
等因查此次湖北湖南兩省境內粵漢鐵路及鄂境川
漢鐵路借款係專爲通籌湖北湖南兩省境內地段路
綫並非接至四川成都之鐵路再查貴部於光緒二十
九年六月曾復美使一函內有總之各國公司請辦中
國鐵路均應由中國酌定不能以請辦未定之案視爲
應得利益並爲日後儘先承辦之舉等語是當日並未
允許美國承辦借款貴部此函駁復美使之語所言不

能以請辦未定之案視爲應得利益及儘先承辦之據措詞極爲嚴正公允現在此項鐵路辦法自可由中國隨時酌定毋庸定向英美兩國公司商議惟中美兩國睦誼素敦敝處籌借路款自去年七月起已經十箇月如上年秋間美國將允願借款之意早爲提議敝處亦願同爲商借現在敝處與德華匯豐各銀行久經定議草約貴部所稱美國柔使願商借款之函近數日始到爲時已遲無可如何爲此函復貴部請將此次借款爲時已遲不及將美國增入通融辦理情形代爲婉復美使爲禱

宣統元年四月十九日

又

前接大咨具悉美費署使面交節略內稱此次借款應與美國資本家商議意欲將英法德借款分撥若干均需利益等語當經敝處以已與英法德三國銀行議定合同業經簽押無從與美國商借實未便再令承辦人員轉商致生別項枝節等因於四月二十九日咨復貴部仍請查照見復在案事已經月尙未接貴部核復正深焦急懸盼昨接三國銀行來函據稱美國銀行遣派代表在倫敦與敝銀行等會商當經敝銀行等允將湖北境內川漢鐵路借款總數四分之一作爲美國分借

之款經美國銀行代表轉詢後據稱回電屬其加入兩湖境內粵漢鐵路借款分借四分之一卽係五百五十萬鎊借款全數四分之一美國銀行此次所請加入一節敝銀行等實不能復允現因所商未能就緒理合從速陳明等語查敝處屢次復文因美國來議過遲實屬自誤本未允許美國借款惟念中美兩國交誼素敦且查光緒二十九年六月間貴部復美國康使函於美國請准承辦川漢鐵路借款一節雖未允認亦尙有案可稽此次美國願商借款之說爲時已遲如將來三國銀行肯與美國銀行和衷商議分借此項借款但使已簽

押之合同不再更動敝處亦並不堅執前說不肯允借此卽顧全中美兩國交誼格外通融之辦法也今乃聞三國銀行已允美國銀行以鄂境川漢鐵路借款四分之一美人更欲分借兩湖粵漢鐵路借款四分之一致使三國銀行罷議延緩日期鄙人深爲駭異查粵漢鐵路前因美國合興公司私將底股三分之二轉屬比國違背合同經鄙人訪聞奏明息借英國一百一十萬鎊之鉅款始將該路主權利權合行贖回此時斷無復借美款修築該路之理且自光緒三十一年十二月中中國贖回粵漢鐵路以後該路並無允許美國借款之案美

國何至無端更欲分借粵漢鐵路借款斷斷無此辦法
此議一出三省全路紳民必至譁然駭怪訾議沸騰羣
相抵抗斷不遵從卽鄙人亦決不肯於此路自美國贖
回以後重復又借美款修造粵漢鐵路也再做處前准
大咨屬令暫緩出奏現在爲日已久鄙人責任重大眾
情盼望甚急未便久延擬再稍緩數日專候復音如美
國於三國銀行允借鄂境川漢鐵路借款四分之一至
公至平之辦法尙未允認致使無從轉圜做處實不能
再爲延候惟有將三國銀行已訂之合同先行出奏以
免貽誤要工相應函達貴部卽希從速照鄙人原函轉

致美使爲盼

宣統元年五月二十六日

又

前以美國欲均分鐵路借款致使敝處與英法德三國銀行已經簽押之合同至今未能出奏曾經函請貴部速爲轉達美使早日定議迄未得復焦急萬分兼旬以來經敝處與三國銀行屢次委婉切商現聞三國銀行皆已願均分借款美國總無切實回音一味延宕實出情理之外爲日業已過久萬一債票價落中國借款扣頭必致大受其虧夫豈美國所謂篤念兩國交誼之美意乎此路乃中國大政南北利害樞紐環球屬目豈能

聽人無理要挾耽閣經年自誤大局且延宕不已枝節橫生將來亂民會黨意外波瀾都難逆料洞身膺重任曾被先朝嚴旨責成尤深悚懼務請貴部迅速切商美使除粵漢鐵路從美國贖回萬難復借美款外至借款總數三國銀行業已允認四國均分並無軒輊蓋川漢路本議必須續借現議此次借款將川漢多借數十萬鎊三國銀行允願勻出川漢借款之半全分與美三國僅分認其半務使四國統算借款總數彼此必得均平似此最爲公平而又極力遷就之辦法可謂至矣盡矣蔑以加矣務囑其速電本國派定銀行代表早與三國

銀行直接商明俾得定議奏准早日開工免誤要政曷
勝盼禱再近日俄國竟藉詞漢口茶務強欲分認借款
此等毫無情理毫無案據之言均可任意要求其爲欺
藐我國者至矣此端一開各國皆羣起效尤他日中國
興一工辦一事外人皆得而干預之束縛之中國將何
以立國乎此時彼旣公然啟齒若不早爲拒絕彼且認
爲默許延宕愈久交涉愈難此係貴部亟應嚴防之事
洞實不能不代爲隱憂也務請迅速駁拒爲禱專此奉
達鵠候示復扶病作書不勝翹盼迫切之至

宣統元年六月

覆商部

前月接奉公函詢及商部應辦事宜仰見虛衷講求曷勝欽佩當將管見各節面告菊人左丞託其轉達想入清聽竊謂農工商三端事本相因整頓農工自皆於商務有益惟是農事皆麗乎土地無論山林藪澤開墾培植皆是地方官之事處處與民事及地方公事牽涉恐不能盡歸之於商若事事由京城商部代謀既多紛擾之處亦恐不免侵官之嫌似不相宜至勸工固屬要義然工藝一道官不能勸工惟商乃能勸工耳若此一貨銷路快運商多則業此工者日多製此貨者日精故必

商學既博則工藝自盛若無運商無銷路則工亦安從
勸哉蓋辦事必須有條理尤必須有次第此時正當貴
部創設之初其下手應辦者約有數端

一曰講商學機器格致化學皆製貨者所當曉各國風
尚道里遠近口岸衝僻皆運貨者所當知若無此學不
過步人後塵聽人操縱豈能獲利現在議各學堂章程
卽有農工商實業學堂在內果能認真開辦處處多設
數年畢業以後商智漸開自必各出新意自闢利源此
自學之於中國者也一面多派學生數十人分至東西
洋入其商業學堂分門學習分爲兩班一班學速成科

兩年畢業一班學完全科五年畢業速成學生畢業回國即可分任以事完全科學生畢業回國更可加精加詳如此則所講商務皆有實際且切於今日中外通商之情形矣此分學之於外國者也收功似乎稍緩數年然必從此下手方有實效此爲商政第一義

一曰定商律商律之義保護而已矣禁訛詐禁假冒禁虧塌准專利現貴部正議定商律須俟商律成書後曉示民間方能見效

一曰開商會商會者謂於繁盛鎮市令商人自立一會按期聚會互相講求孰利孰害孰緩孰急若上海天津

漢口廣東等處尤要并可由商會中自籌經費自行推舉明習商務老成練達者若干人遊歷東西各國考校各國華貨銷路遲速運道難易回華以後自然展轉布告商智日開矣

一曰恤商情恤者平日不騷擾將辦之時不需索辦成以後不苛征如此而已或初辦數年免稅或有稅而從輕商人樂其不擾不苛自然踴躍營運不待官之督勸也

總之以上各事出洋習商學定商律兩條應由官迅速辦理中國立商學一條應由官認真勸辦然經費難籌

則學堂之多少難定恤商情一條應隨時由官體察酌辦至商會可勸諭商人自爲之不須官出經費亦不可令商籌經費交官辦理此最爲商人所深忌蓋中國商務之通病往往未辦事先須費錢若干必須先除盡此弊始可言商務矣若官勸設公司斷斷無益有大利可圖有資本可集自必趕設公司何待官勸若無把握勸亦不行管見則謂此時貴部所宜急辦者尤在迅速選派明白切實人員出洋遊歷專意考求商學期以兩年回華與所派學習商務速成科之學生同時回國則胸中既有成竹措施自有次第此尤爲要著中之先著近

聞貴部擬派員至各省查考商務此時官既不悉商情
商亦不喻官意恐無大益徒致紛紜竊思與其派員赴
各省不如派員赴各國俟遊歷各國考察商務之各員
回華再行派往各省其考求海疆之物產商務者派往
沿海考求江湖之物產商務者派往沿江考求陸路山
林之物產商務者派往內地各省則所到各處皆能爲
商賈工業農民指出某國商業有可仿照營運之法某
事有可抵制漏卮之方某處有可銷流外國之貨某處
有擅長之手工有可製造之棄物某處有宜廣植之物
產有可采用之新法地不空到語無虛發自然商民感

激鼓舞生機蓬勃舉辦雖遲兩年而動必有成無曠時
亦無糜費是似遲而實速較之聚集多員於京城空煩
文牘徒耗經費爲益多矣何如移京署之經費爲出洋
員生之經費乎每一游歷委員一年約需五千金若派
十員每年計五萬金每一遊學生西洋年約需二千金
因需用繙譯故費尤多東洋約需五百金若派學生四十人西洋

二十人東洋二十人每年計五萬金共十萬金芻蕘之

見不知有可采否一得之愚聊塞下問統惟鑒察

光緒二十

九年十二月
月日

致農工商部

頃承電索敝處所譯各國鑛章稿本查各國鑛章前經委派洋員購取洋文分派譯員摘譯計譯成英國煤鑛定律一冊英國鑛務冊記一冊英屬圭備格鑛務章程一冊法國鑛務章程一冊美國鑛務章程一冊德國鑛務章程譯略一冊奧國鑛務章程譯略一冊比國鑛務章程譯略一冊日斯巴尼亞鑛務章程譯略一冊又英使馬凱交來中國鑛務章程草議一冊又印度鑛例一冊共十二冊彙裝一函茲特固封交郵局寄呈台覽其中所黏各籤乃初次發交委員閱勘所黏者頗爲簡略嗣經刪改鈔寫成冊復另派委員細勘一次又經洞親

自獲勘將總綱大例及字句文義細加推求另行編訂
繕清復屢加斟酌修改共已四易其稿始敢作爲定本
此冊內各籤已是筌蹄無關要指不過姑存卷內以存
最初之面目耳查鑛務爲今日理財要政近來中外商
人亟盼中國鑛務新章及早頒行俾可遵章稟辦務望
貴部從速參考核定早日奏覆請旨施行曷勝翹盼再
敝處奏進鑛務章程摺內有兼采日本鑛章一語係當
時詢據日本法政員稱述並派譯員就日本法規大全
內所載鑛務條例詳加參校而得者並未譯有專書併

以附陳

光緒三十二年
十一月十九日

致英國駐漢總領事法磊斯

前派周守以翰同普利公司洋商前往黃安採取鑛砂計在睡虎山采得鑛砂四千二百斤在黃金砦采得鑛砂一百四十餘斤在明家山采得鑛砂十斤均已交該商人承領一切開挖之費均由官出當時因明家山鑛砂甚少該商人必欲開深致巨石猝倒壓傷做工人名其一人受傷甚重羣情洶洶周守恐別生枝節該商人亦有戒心因彼此商允停工回省此次該商人約同鑛師前往又經黃安縣通融辦理准代雇夫再爲開挖鑛砂兩日計得鑛砂若干現尙未據稟報各山鑛質經

本部堂飭局化驗睡虎山係最佳鉛礦明家山黃金砦
皆係銅礦惟明家山礦質雖佳該山蘊礦砂少開采費
工不能多得此前次在黃安采礦情形也該洋商如僅
爲化驗計所得礦砂已屬不少儘足敷用至欲試辦一
年非俟新定礦章奏准頒行該商人遵章訂立合同未
便遽議即使該商人願遵新章辦礦亦止能認定一處
指明一礦方爲合理安能將黃安一縣之礦概許該商
人包攬耶此時該公司如必欲采足二百石之數須先
指定山名礦質候本部堂酌核辦理希卽轉飭普利公
司商人遵照爲荷

光緒三十一年
二月十六日

又

此次借款承貴總領事代爲介紹辦法極爲公道本部
堂感謝良多以後粵漢鐵路如須向外洋續借造路之
款自當先與貴國詢商果其利息抵押等款較他處相
宜應先儘貴國承辦如造路借定英款則粵漢鐵路需
用之外國工程師當一半雇用英國人其粵漢鐵路需
用機器車料等項除鐵軌係用漢陽鐵廠所造枕木係
用中國所產外凡用外國物料者亦可先儘英商開價
由鄂湘粵三省總公司擇公道便宜者訂辦特此專函

奉達卽希貴總領事查照

光緒三十一年七月十九日

又

廣州九龍鐵路一事本與此次借款無涉初與貴總領
事商辦借款時亦未嘗提及廣九鐵路本部堂權限職
分只在粵漢鐵路一事且當初議辦廣九之路之原委
本部堂全然不知故廣九鐵路之辦法本部堂不敢越
俎輒下斷語實未便干預其事總之借款一事乃承薩
大臣及貴總領事與本部堂之厚誼和衷本部堂實深
感謝至廣九鐵路本部堂實不願與聞務望貴總領事
轉達薩大臣見諒將借款一事萬勿牽涉廣九鐵路是

所深感

光緒三十一年
七月十九日

又

梁大臣處所訂正約現尙未到金元小票比股東願留本可不必收贖鄙意如能借利息較輕之款收回自較合算故以奉商至合興公司應交全路利權及一應產業文契均已於本月十二日在粵滬分別交收矣儻續借之四十五萬鎊貴國政府或有爲難卽作爲罷論可也至前言二十萬鎊復言四十五萬鎊係汪守面與貴總領事核算連加息年利等項須有此數方足贖回二百二十二萬五千餘元之金元小票非有他也昨又接誦惠函並華英華中兩公司借款節略等件詳加察閱

與本部堂前日面議間有未符其借款扣頭究竟於九
四之外能否減讓若干總以定一確數爲準未便參用
活筆似此種種尙待斟酌容酌定後再派汪守偕詹繙
譯同赴尊處面商一切本部堂日來感冒畏風未能接
晤尙希見諒爲荷至前言鐵路工程師金達一節借款
未議定以前萬勿招其來鄂特此奉達

光緒三十一年
九月二十三日

致周玉山

杜軍換統一事前奉賜電謂除換將整頓別無辦法極
佩盡籌茲端午帥過鄂與弟面商定議以劉華軒提軍
責任注重專在湘西防務若帶所部至永接統杜軍湘

西又須另募新軍派將填紮兼顧湘西諸多窒礙查提
督張慶雲本湘中宿將最爲出色其軍現駐黃沙河距
州僅九十里以之就近接統杜軍必可得力於事亦便
特擬會奏電稿一紙一切詳細情形具詳此稿內適因
電綫水阻不通特錄稿專弁送呈台覽務請詳切改定
此電卽由甯迅速拍發爲禱

光緒三十一年
十二月十二日

致劉梅卿

朝鼎

自離黔中久疏箋敬數年來屢向俊卿喬梓問候起居
稍知近狀具稔道履康娛著祺日懋靈光碩望矜式攸
資曷勝馳仰回憶郡閣趨庭獲瞻文範范希文之劬學

遂而儒林之山斗彌尊欣慰之餘愈殷洄溯先大夫服官珂里歷年最深與貴郡士民亦最洽先則受經興學橫舍弦歌終則枕戈同袍危城患難歲月如駛倏已五十餘年乃荷貴郡父老緬懷舊政共建私祠追思同覲首之碑遺愛等樂公之社具見貴郡薦紳耆舊性情之敦厚堅於金石風義之高迥上薄雲天寄示祠堂圖象并拜祭扁聯各圖當卽一一敬謹瞻禮望風百叩不知感涕之彌襟矣惟是祠宇旣成而歲時灑掃修葺之費祭期蘋藻品物之需必須籌有常款乃克經久貴郡諸

同人勞費已鉅寸衷深抱不安萬不敢再以此累及諸君茲特滙寄千金擬酌量購置田租若干石以爲祭田并充歲修之費已託宋張兩世兄到黔後與台端商酌辦理再興郡學堂聞因經費未充規模尙未大備以故學子尙屬無多謹捐寄千金以助興義府城學堂經費并寄去學堂應用圖書儀器計中學二十分每分十五種高等小學三十分每分十種中小學公用圖及儀器一分共十二種并希點收應用特是延師選徒經營布置恐尙需時竊擬招致貴郡行端質美諸生十人卽日來鄂附入各學堂肄業庶可期早覩成材所有來鄂川

資及在鄂附學學費皆由弟代爲籌備務請會商同人
迅速遴選遣之與宋張兩世兄偕行返鄂實深翹盼專
此肅函令族姪毅隨同赴黔面謁台端及諸同人敬鳴
謝悃同郡諸君不能一一致書均請代達鄙忱申謝光緒

三十三年四月二十三日

與黃仲韜

日本貴族院議員伊澤君修二在京晤談此君於中國
文學根柢頗深因日人有廢漢文之說特立漢字統一
會並擬聯東亞諸國儒者維持漢學謬以鄙人海外知
名公舉爲該會會長僕年老學荒豈能勝此且現居樞

要政務殷繁亦無暇與外國人聯絡結會當舉足下以
代伊澤君亦甚傾慕據云擬便道赴武漢考察藉聆閤
議特爲介紹一言尙希撥冗接見以副此君願言之雅
光緒三十四年
九月二十五日

致郵傳部

洙昭路綫一事昨接湘路公司王紳先謙余紳璧康席
紳匯湘等庚電請仍將此路交公司承辦一切如何稟
督稽核并如何嚴定期限之處無不惟命是聽卽萍局
已購有料件公司亦可一概承受等語又接盛侍郎佳
電請飭由湘公司兩頭卽日開工限八箇月告成所有

運煤經費悉照萍沱合同按里科算各等語查此段路綫貴部當日擬由部辦自係爲工速運利起見惟此路現勘應修者不足四十里萍煤遇水漲時至沱洲時卽須下船水涸時過易家灣以下仍須經由幹路而行似由萍至沱由萍至昭得失無幾敝處去冬曾派李道寶淦赴湘會勘此綫雙綫之處雖不甚寬並軌尙能設法若如湘紳所議止造單軌一綫他日幹路發達之後必致煤貨擁擠自蹙路利現在總須劃留雙綫地位以備煤貨並盛之時卽令湘省添築應用至運煤按里計費尙有定章湘公司決無我行我法之理獨勒重價特此

奉商貴部鄙意擬即將該綫允交幹路承修當由敝處督飭湘省官局公司限期趕工以免久延萍煤運道有誤漢陽鐵廠工作特此函達卽所酌核示復爲荷

宣統元年

與梁崧生

昨承示英國朱大臣節略藉悉一切敝處昨亦接到漢口法總領事來電一件特抄呈察閱查從前贖路之時極承法總領事厚意深爲可感是以訂有照會今日若處處皆按照會辦理本係最易商辦之事蓋前在漢口所訂照會大綱辦法本已載明足爲依據又有最近之

津浦郵部各借款合同可爲參仿此次祇一商訂息扣數目卽可定局乃濮蘭德不顧前訂照會節外生枝必欲令總工程師於購料用款簽字思干涉中國路權鄙人雖極重交誼但似此無理要求何能照允縱使鄙人輕率允許亦必爲各部所駁詰各省士民公論所詆訾終必不能照辦仍然於事無益濮蘭德旣已自聲明不辦且令與他國商辦查濮爲法總領事電明朱大臣所薦舉之人濮旣決言不辦自足爲英國辭辦此事之據鄙人先請法總領事派員又與濮商議多日者係按照會先儘英國詢商開價之義辦理濮旣不辦改與他國

商辦者係按照會由中國酌擇公道便宜者另行籌借之義辦理刻下與他國所商大致已有頭緒濮所力爭者他國皆未爭愈顯濮節外生枝不顧交情有意挾制鄙人既已竭盡情誼處處按原訂照會辦理且與他國商訂將定自可不必再與濮蘭德開商似亦無不合之處矣但念與法總領事交誼夙敦又重以朱大臣轉託台端之意因格外顧全睦誼姑允再與濮蘭德開商一次但有三事必須濮蘭德應允方與開商如不允卽不必再商矣

一總工程師祇管分內應辦工程之事餘事皆不得干

預購料用款不能簽字

一各條大概均仿照津浦合同辦理不得於津浦合同所准權利之外另有要求惟經理購料一層須先儘中國自有自造材料購用在合同內切實聲明照津浦合同原文須略加更改

一合同條款大概既均仿津浦辦理必須於兩日內商議決定決定後在三日內與他國各密開息扣價值當面揭封不得藉詞支延

以上辦法擬託台端轉達朱大臣酌核轉飭并卽示復無誤鄙人與他國商訂定局是爲至盼再查照會內所

指先儘英款商借自係指英國各商款而言非指中英公司一家如按照上開辦法朱大臣能另派他家來做公所商辦尤爲鄙人所深願也至英使館與外務部派員調停一節似可不必因此事本甚易辦如濮不節外生枝即可定議如仍始終堅執卽無可再商均無所用其調停也祈并轉達

宣統元年二月初一日

又

頃誦來函錄示英國朱大臣節略并閣下面告高曾兩委員兩次與朱大臣面談各節均已聆悉查當日漢口法總領事慨借贖路款深爲可感鄙人銘泐不忘是以

與法總領事當面商定照會各節正所以爲酬報如果
法總領事於照會各節不能滿意借款卽不能成議矣
至簽字一節當日照會并未提及未便添入朱大臣節
略言造路向係如此辦理云云查他路是否如此不能
援照若前年鄙人會奏定之津浦路合同卽無簽字之
條又如鄙處前函息扣高低須詢商他國同時開標一
節乃是最公道辦法卽如他路合同內有購料先儘借
款之國之語者亦係同時開標可爲確切比例證據總
之此項借款斷不肯移作他用以及糜費濫用將來如
何用法必能令借款公司相信然總須於主權絲毫無

損鄙人自當籌一妥善辦法鄙人於此事固深感英政
府篤念邦交之厚誼朱大臣和衷商辦之雅懷惟只能
抱定從前照會辦事因今日各部院衙門好挑剔者尙
多此乃無可如何之事尙祈閣下向朱大臣婉達鄙忱
并希朱大臣原諒是所感禱此事議已數年其間多有
梗阻今幸奏明議辦鄙意真心願與英國妥商辦成此
事免爲旁人譏笑則是鄙人所深盼者耳如拖延日久
不能定議萬一別生枝節此路竟不能辦成鄙人固所
不願想亦朱大臣之所不快也

宣統元年二
月初七日

又

粵漢鐵路借款一事前經催令濮蘭德速開價值嗣據
濮蘭德稱所有辦法及價值准於十四日下午四五點
鐘訂定如英國不欲承辦此事亦於十四日回復等語
嗣於十五日上午十一點鐘濮蘭德來公所面稱借款
事如照津浦合同辦理中英公司決不肯辦當經高曾
兩委員再三詢問濮蘭德已切實聲明決意退辦查此
事關係重要已與英公司商議數月可謂情誼兼盡彼
既始終不肯開價現又明言退辦鄙人恐貽誤路政因
不得不改與他國商定是日下午三點鐘卽與德華銀
行柯達士面商訂定大概辦法均仿照津浦合同辦理

惟息扣較津浦尤格外公道并據柯達士寫立函單爲據及至七點鐘後濮復由德律風傳達請再展期一日當經高曾兩委員告以已與德國開商既請展期允以一日爲限乃候至十六夜濮仍無一准回信鄙人實不能再候致徒延誤時日遂函復德華銀行允認其所立函單爲據矣所有粵漢鐵路借款中英公司業已退辦及改與德華銀行商定情形合亟函請台端轉達英國朱大臣知照并煩將如此辦法實非鄙人本意因已延誤多時事體重要前已歷次函陳不能久候始迫而出此也

宣統元年二月十七日

又

前由貴部開送六月二十五日卽西歷八月十號在署
與美署使面商各條既經與三國銀行接洽彼此允願
內除借款數目更改外原合同概行照舊其餘大致均
可通融辦理至延用美國工程司數人一節查合同附
件內有各段所用工師技手等應聽憑督辦大臣或派
用中國人或派用歐洲人或由勘路情形熟悉酌派日
本人等語中國向來視美國與歐洲人無異故僅用歐
洲字樣將來需用各項工程司之時自當歐美一律酌
用希將鄙人此意轉達美使爲荷再聞美國所派銀行

代表人已來京多日務祈貴部代催美使轉飭所派銀行速與三國銀行妥商定議以憑早日出奏實深盼禱
宣統元年七月十一日

又

昨由宗委員鶴年鈔呈俄使交來節略及擬復俄使節略二件接閱之餘實深駭異查此次借款先與中英公司開議嗣與德華銀行續商均係有往年成案在先自應如約辦理後因中英公司未能就範英國改派匯豐銀行接議以中英本有法商在內加入匯理銀行尙非節外生枝至美國銀行分讓鄂境川漢借款一節亦係

貴部於光緒二十九年曾經商允亦屬有案可援有詞
可藉想皆閣下所深知中國與各國交誼本無歧視然
辦理內政自有主權辦理外交須有成案外人斷不能
憑空強爲干預前次俄人妄肆要求卽經敝處函勸速
爲嚴詞駁拒及閱貴部照復俄使原稿僅敘業已成議
無從再商等語未將各國銀行皆有案據可援各情形
詳細剖駁以絕其望致俄人認爲所列意見并不固執
遂思設法嘗試覬覦攙入設若再許其請不惟四國銀
行萬無輕允之理中國毫無主權任人干涉其將何以
爲國鄙人事有專責更將何以對三省何以對天下乎

尊處所擬復俄使節略語氣太鬆且多有隱許可以通融之意實百思不得其解想貴部外交日形棘手有不便與各國輕傷感情者此事不妨聲明督辦大臣專政以期互相維持務祈閣下將以上所述詳情嚴拒俄使并告以匯理銀行卽係附入匯豐辦理全由英商作主并未與英德兩國銀行並列萬不能於匯理之下更列華俄銀行字樣此種影射之言萬不可信卽匯理偏袒俄商徇彼所請英商亦斷不肯強爲牽就萬一爲俄所感恐交涉之事不在俄而在英矣思之彌爲可懼如貴部照復俄商難於措詞卽將該使原交節略鈔咨敝處

再由敝處嚴加駁拒貴部據以轉復俄商何如

宣統元年七月

二十四日

致寶竹坡

寄示攻駁西學談天一篇用意極正大可佩與楊光先不得已一書異曲同工惟天算之術究係專門執事於推步未能燎然故攻擊處尙未中其要害竊思天算最耗心力較之考據尤甚此等學術似非我輩中年以往而又孱弱多病之人所能窮究我兄之意無非以閒居多暇不欲以玩愒遣日故欲於著術中爲補救世道人心之計此誠古來賢人志士之所爲也尊意旣喜考據

則天算不如經史事是素習較易致力且考釋經史亦有樂趣經之體尊史之用廣史學又差易且令人心思壯闊於善病者尤相宜也

如考經學一事一語須繙數十種書史學則不過繙數種

書至十許種足矣

本朝史學家蒐考

惟下筆必須矜

亦極繁極細然亦稍有貪多識小之弊

慎經學尤甚經說往往因一字誤解一篇俱廢一數有

差立義全失

或年月或物數

史學尙不至是事實較明證佐較

多耳

經說諸篇前屬經生鄭伯更細讀久而未復頃從粵索回現存做處當再覓人看之斷不散失尊意大抵於天算則主中而駁西於經學則抑漢以申宋此微指所在

以爲此所以救世道人心也惟天算中法實不如西法

經解宋學實不如漢學若云救世但當破近日眩於西

法之迷途發墨守漢學之流弊方爲有益若并西人之

天算法漢學家之考據訓詁而駁之

尊意亦欲就考據訓詁以駁近日經

學但似未能入其間與既非事實終不能勝矣西法迷途者知西

人算術機器製作之精於是心悅頂禮并慕其飲食衣

服風俗而效之忘其狙詐貪狠而信之震其富强整齊

自安貧弱無能以得免觸怒爲幸隱忍遷就以從之

西人

實是富强整齊我有自治此西法之迷途也

客氣空言自強之道則足以敵之矣亦迷也

通經貴知大義方能致用義理必出於訓詁於是因訓

詰而事考據因考據而務校勘久之漸忘本意窮末遺
本買櫝還珠與身心世務全無關涉此漢學之流弊也
若能通西法以得自強之術博漢學以爲明理之資是
西法正爲中國所用漢學正爲宋學所用豈非快事便
宜事何爲反攻之乎天旋歲差諸條西法固精即使錯謬於實事何害此不足爲中國患
者也弟庸鈍衰朽不合時宜自知無用於世事事棘手日
日思歸但求經手事體粗有規模可以稍塞咎責卽當
早避賢路他日還至都下與兄晨夕過從商量學問擬
成數卷說經之書非尊判亦可隨時獻疑參訂豈非至
還都則斷無暇也樂爲期不遠此願當易酬耳第有自知之明仍是文學較長耳故所用其願長也

致廣雅書院分校馬季立黃子鵬林子颺黃芭香
著袂以來倏已逾歲每懷雅度未之或忘書院創始不
易收效甚長惟望互爲維持俾高材生接迹其中蔚爲
時彥則誠東西兩省之幸區區之懷亦藉以稍釋矣春
季卷已閱竣卽日寄回每卷皆兼數體校閱較費目力
若詳考出典不免時須檢書其勞同於作者至於評隲
之精甲乙之當尤爲識力並到諸生學業之進自由於
此而鄙人於每年四季亦得時修舊學商量之業案牘
如山抽空披覽相隔數千里恍若對面討論誠可樂耳

與俞階青

前閱報紙卽聞令祖曲園前輩大人噩耗私衷驚悼莫
可名言嗣奉訃音並讀留別諸詩仰見襟懷灑落道力
堅深其存也超然於聲色貨利之途其歿也了然於生
死去來之故可謂合靖節康節爲一人矣溯自道咸以
迄今日世風益變耆宿罕存獨令祖大人以魯殿靈光
爲昌黎泰斗守樸學於經籍將熄之秋養高躅於功利
競爭之世主持壇坫凡數十年著述名山逾六百卷以
翰林歸田隱居終老名望日隆似全樹山蔣心餘洪稚
存而享年之高過之主講名都成就後進教澤廣被似
杭大宗姚惜抱陳東塾而著書之多過之又得閣下謀

承燕翼美濟鳳毛追小同之傳經效范喬之捧硯沐天
語而列儒林真無媿色繩祖武而述明德必有達人此
則海內人倫同深欣慰者也猶憶同治丁卯得一見令
祖大人於金閭備聆教益佩仰良深其後雖書問曾通
而山河遠隔今則湖樓如故已等黃壚滄海思賢僅留
畫象撫今思昔曷勝撫然謹具挽聯一副素幃一懸敬
祈代告几筵以當芻束至爲感幸

張文襄公全集卷二百二十一

書札八

新城王樹樸校